

Na osnovu člana 58. Zakona o komunalnim djelatnostima („Sl. glasnik Unsko-sanskog kantona“ broj 4/11, 11/11, 6/12, i 13/12), člana 16. Zakona o vodama („Sl. glasnik Unsko-sanskog kantona“ broj 4/11) i člana \_\_\_\_\_ Statuta općine \_\_\_\_\_ ( „Sl. glasnik općine \_\_\_\_\_“ broj \_\_\_\_\_), Općinsko vijeće općine \_\_\_\_\_, na sjednici održanoj dana \_\_\_\_\_ godine, donosi:

## **ODLUKU O SNABDIJEVANJU PITKOM VODOM -ogledni primjerak-**

### **I OPĆE ODREDBE**

#### **Član 1. (Predmet Odluke)**

Ovom Odlukom uređuje se obavljanje komunalne djelatnosti snabdijevanja pitkom vodom na području općine \_\_\_\_\_, a naročito:

- a) vrste vodovodne mreže i drugih objekata i uređaja kojima se obezbjeđuje obavljanje komunalne djelatnosti snabdijevanja pitkom vodom,
- b) uslovi i način obavljanja komunalne djelatnosti snabdijevanja pitkom vodom,
- c) izgradnja vodovodne mreže i drugih objekata i uređaja sistema snabdijevanja pitkom vodom,
- d) upravljanje, korištenje, održavanje i mjere zaštite objekata i uređaja sistema snabdijevanja pitkom vodom,
- e) uslovi i način snabdijevanja pitkom vodom korisnika usluge,
- f) uslovi i način priključenja korisnika na objekte i uređaje sistema snabdijevanja pitkom vodom,
- g) međusobni odnosi davaoca i korisnika usluge snabdijevanja pitkom vodom,
- h) način obračuna i plaćanja naknade za pruženu uslugu snabdijevanja pitkom vodom,
- i) uskraćivanje usluge snabdijevanja pitkom vodom i prava korisnika usluge u slučaju neizvršavanja odnosno nekvalitetnog vršenja usluge snabdijevanja pitkom vodom,
- j) mjere koje je dužan preduzeti davalac usluge u slučaju prekida usluge snabdijevanja pitkom vodom,
- k) način postupanja i ovlaštenja općine u obavljanju komunalne djelatnosti snabdijevanja pitkom vodom,
- l) nadzor na provođenjem odredaba ove Odluke,
- m) kaznene odredbe za nepoštivanje odredaba ove Odluke.

#### **Član 2. (Definicija komunalne djelatnosti snabdijevanja pitkom vodom)**

Komunalna djelatnost snabdijevanja pitkom vodom podrazumjeva poslove zahvatanja, kondicioniranja i isporuke vode korisnicima usluge za piće i druge potrebe, vodovodnom mrežom do mjernog uređaja korisnika usluge, uključujući i mjerni uređaj

### **Član 3.**

#### **(Objekti i uređaji sistema snabdijevanja pitkom vodom)**

- (1) Objektima i uređajima sistema snabdijevanja pitkom vodom, u smislu odredaba ove Odluke, smatraju se izvorište, objekti za zahvatanje vode, objekti i uređaji za prečišćavanje (kondicioniranje) vode, crpna postrojenja, rezervoari i javna vodovodna mreža koju čine magistralni cjevovodi, ulična razvodna mreža i priključci na javni vodovod do mjernog uređaja korisnika usluge, uključujući i mjerni uređaj.
- (2) Tehničko jedinstvo sistema snabdijevanja pitkom vodom ostvaruje se povezivanjem objekata i uređaja iz prethodnog stava ovog člana.
- (3) Tehnološko jedinstvo sistema snabdijevanja pitkom vodom ostvaruje se zajedničkim i koordiniranim radom objekata i uređaja iz stava (1) ovog člana, optimalnim kombinovanjem njihovog rada i kapaciteta, jedinstvenim upravljanjem, kao i obezbjeđenjem propisanog (potrebnog) pritiska vode u sistemu.

### **Član 4.**

#### **(Davalac usluge)**

Komunalnu djelatnost snabdijevanja pitkom vodom na području općine \_\_\_\_\_ obavlja javno preduzeće \_\_\_\_\_ koje je osnovala općina \_\_\_\_\_ i povjerila mu obavljanje komunalne djelatnosti snabdijevanja pitkom vodom, u skladu sa odredbama Zakona o komunalnim djelatnostima ( u daljem tekstu: davalac usluge).

### **Član 5.**

#### **(Korisnik usluge)**

Korisnikom komunalne usluge snabdijevanja pitkom vodom smatra se svako fizičko ili pravno lice koje se snabdijeva pitkom vodom iz javnog sistema snabdijevanja pitkom vodom i koje je sa davaocem usluge zaključilo ugovor o međusobnim pravima i obavezama u pružanju, odnosno korištenju komunalne usluge snabdijevanja pitkom vodom u skladu sa odredbama člana 25. Zakona o komunalnim djelatnostima (u daljem tekstu: korisnik usluge).

### **Član 6.**

#### **(Odluka o mjesnim –seoskim vodovodima)**

Izgradnja, korištenje, zaštita, održavanje i upravljanje mjesnim (seoskim) vodovodima, javnim bunarima i javnim česmama urediće se posebnom općinskom Odlukom u skladu sa odredbama člana 60. stav 2. Zakona o komunalnim djelatnostima

## **II USLOVI I NAČIN OBAVLJANJA KOMUNALNE DJELATNOSTI SNABDIJEVANJA PITKOM VODOM**

### **Član 7.**

#### **(Način obavljanja usluge snabdijevanja pitkom vodom)**

- (1) Davalac usluge je dužan trajno i kontinuirano korisnicima usluge obezbijediti isporuku dovoljnih količina pitke vode, kao i da obezbijedi odgovarajući pritisak vode na mjestu spoja vodovodnog priključka sa vodovodnom mrežom , neprekidno 24 sata dnevno, pod jednakim uslovima za sve korisnike usluge.
- (2) Isporuka pitke vode se ne može uskratiti korisniku usluge, osim u slučajevima i pod uslovima utvrđenim Zakonom o komunalnim djelatnostima i ovom Odlukom.

## **Član 8.**

### **(Obaveza zdravstvene ispravnosti pitke vode)**

- (1) Davalac usluge je dužan da vrši isporuku zdravstveno i higijenski ispravne pitke vode i odgovoran je za pravilnu primjenu propisa, standarda i tehničkih mjera kojima se postiže propisani kvalitet pitke vode.
- (2) Voda iz javnog sistema snabdijevanja pitkom vodom mora odgovarati standardima i propisima za pitku vodu.

## **Član 9.**

### **(Postupanje davaoca usluge kod prekida u snabdijevanju pitkom vodom)**

U slučaju planiranog prekida u snabdijevanju pitkom vodom, davalac usluge je dužan obavijestiti korisnike usluge o predstojećem prekidu u snabdijevanju pitkom vodom, jedan dan ranije putem sredstava javnog informisanja, a veće korisnike usluge, koji imaju mjesečnu potrošnju pitke vode veću od 500 m<sup>3</sup>, i pismeno ili putem telefona.

## **Član 10.**

### **(Postupanje davaoca usluge kod prekida u snabdijevanju pitkom vodom)**

- (1) Ukoliko do prekida u snabdijevanju pitkom vodom dođe djelovanjem više sile (kvarova u vodovodnoj mreži, prekida u snabdijevanju električnom energijom crpnih postrojenja i sl.), davalac usluge je dužan naknadno obavijestiti korisnike usluge o razlozima prekida u snabdijevanju pitkom vodom.
- (2) U slučaju iz stava (1) ovog člana davalac usluge je dužan odmah preduzeti mjere za otklanjanje uzroka prekida u snabdijevanju pitkom vodom i o tome obavijestiti općinski organ uprave nadležan za komunalne poslove.

## **Član 11.**

### **(Postupanje davaoca usluge kod poremećaja u snabdijevanju pitkom vodom)**

U slučajevima iz člana 8. i člana 9. ove Odluke, kada prekid u snabdijevanju pitkom vodom korisnika usluge traje više od 12 sati, davalac usluge je dužan o svom trošku osigurati najnužnije količine pitke vode za potrebe korisnika usluge domaćinstava u stambenim naseljima, putem cisterni za prevoz i dostavu pitke vode.

## **Član 12.**

### **(Postupanje nadležnog organa uprave kod poremećaja u snabdijevanju pitkom vodom)**

- (1) U slučaju poremećaja u snabdijevanju pitkom vodom korisnika usluge općinski organ uprave nadležan za komunalne poslove, na prijedlog davaoca usluge, može uvesti mjere ograničenja u snabdijevanju pitkom vodom za sve ili pojedine korisnike usluge.
- (2) U slučaju uvođenja mjera ograničenja u snabdijevanju pitkom vodom iz prethodnog stava ovog člana, davalac usluge je dužan da korisnike usluge na koje se odnose mjere ograničenja u snabdijevanju pitkom vodom putem sredstava javnog informisanja i pisanim obavijestima (plakatima) koje se postavljaju na više lokacija području na kojem su uvedene mjere ograničenja u snabdijevanju pitkom vodom obavijesti o tim mjerama i informiše ih o načinu i režimu racionalnog korištenja pitke vode.
- (3) Korisnici usluge dužni su se pridržavati uputstava o racionalnom korištenju pitke vode.

**Član 13.**  
**(Pravilnik o načinu obavljanja djelatnosti  
snabdijevanja pitkom vodom)**

- (1)Davalac usluge će donijeti pravilnik kojim će se bliže regulisati uslovi i način obavljanja komunalne djelatnosti snabdijevanja pitkom vodom.
- (2) Saglasnost na pravilnik iz prethodnog stava ovog člana daje Općinski načelnik (ili općinsko vijeće) općine \_\_\_\_\_.

**III IZGRADNJA OBJEKATA I UREĐAJA SISTEMA SNABDIJEVANJA PITKOM VODOM**

**Član 14.**  
**(Izgradnja i rekonstrukcija objekata i uređaja  
sistema snabdijevanja pitkom vodom)**

- (1)Izgradnja novih i rekonstrukcija postojećih objekata i uređaja sistema snabdijevanja pitkom vodom vrši se u skladu sa zakonskim propisima iz oblasti prostornog uređenja i građenja, voda i komunalnih djelatnosti i podzakonskim propisima donešenih na osnovu tih zakonskih propisa.
- (2)Osnov za planiranje izgradnje i izradu investiciono-tehničke dokumentacije za izgradnju objekata i uređaja sistema snabdijevanja pitkom vodom su planski dokumenti iz oblasti prostora uređenja.

**Član 15.**  
**(Investitor izgradnje objekata i uređaja sistema  
snabdijevanja pitkom vodom)**

Investitor izgradnje novih objekata i uređaja javnog sistema snabdijevanja pitkom vodom na području općine \_\_\_\_\_ je Općina\_\_\_\_\_, odnosno pravno lice kojem je Općina \_\_\_\_\_ povjerila obavljanje poslova uređenja gradskog građevinskog zemljišta i izgradnje objekata i uređaja komunalne infrastrukture, ukoliko se ta izgradnja finansira iz sredstava Budžeta općine, odnosno naknada koje se uplaćuju u Budžet općine na osnovu propisa o prostornom uređenju i građevinskom zemljištu.

**Član 16.**  
**(Davalac usluge kao investitor izgradnje i  
rekonstrukcije objekata i uređaja sistema  
snabdijevanja pitkom vodom)**

Za izgradnju novih i rekonstrukciju postojećih objekata i uređaja javnog sistema snabdijevanja pitkom vodom koji se finansiraju sredstvima davaoca usluge, investitor je sam davalac usluge.

**Član 17.**  
**(Obaveza investitora izgrađenih objekata i  
uređaja sistema snabdijevanja pitkom vodom)**

Izgrađene objekte i uređaje javnog sistema snabdijevanja pitkom vodom, investitor iz člana 15. ove Odluke dužan je predati na upravljanje, korištenje i održavanje davaocu usluge, zajedno sa svom investiciono –tehničkom dokumentacijom,

odobrenjem za građenje i odobrenjem za upotrebu, u roku od 6 mjeseci od dana završetka izgradnje.

#### **IV UPRAVLJANJE, KORIŠTENJE, ODRŽAVANJE I MJERE ZAŠTITE OBJEKATA I UREĐAJA JAVNOG SISTEMA SNABDIJEVANJA PITKOM VODOM.**

##### **Član 18.**

##### **(Upravljanje i korištenje objekata i uređaja sistema snabdijevanja pitkom vodom)**

U upravljanju i korištenju objekata i uređaja javnog sistema snabdijevanja pitkom vodom, davalac usluge je dužan pridržavati se odredaba Zakona o komunalnim djelatnostima, općinske odluke o osnivanju davaoca usluge i ove Odluke.

##### **Član 19.**

##### **(Obaveza davaoca usluge u održavanju sistema snabdijevanja pitkom vodom)**

Davalac usluge je dužan održavati javni sistem snabdijevanja pitkom vodom, odnosno objekte i uređaje tog sistema, u ispravnom i funkcionalnom stanju, koje obezbjeđuje redovno, kontinuirano i efikasno snabdijevanje korisnika usluge dovoljnim količinama pitke vode.

##### **Član 20.**

##### **(Mjere zaštite na objektima i uređajima sistema snabdijevanja pitkom vodom)**

- (1) Davalac usluge je dužan obezbijediti odgovarajuće mjere zaštite na objektima i uređajima javnog sistema snabdijevanja pitkom vodom u cilju njihove ispravnosti, funkcionalnosti i obezbjeđivanja propisanog kvaliteta pitke vode u skladu sa posebnim zakonima i tehničkim propisima i standardima.
- (2) Pod mjerama zaštite iz stava (1) ovog člana podrazumjevaju se mjere fizičke i tehničke zaštite, zaštite od strujnog udara, zaštite od poplava, zaštite od požara i zaštite u slučaju potresa, a u skladu sa važećim propisima koji regulišu te oblasti.

#### **V PRIKLJUČENJE GRAĐEVINA KORISNIKA USLUGE NA OBJEKTE U UREĐAJE SISTEMA SNABDIJEVANJA PITKOM VODOM.**

##### **Član 21.**

##### **(Priklučenje građevina na objekte i uređaje sistema snabdijevanja pitkom vodom)**

- (1) Svaka građevina za čiju izgradnju vlasnik građevine posjeduje odobrenje za građenje i koja se nalazi u ulici u kojoj je izgrađena vodovodna mreža sistema snabdijevanja pitkom vodom, mora se priključiti na tu mrežu.
- (2) Izuzetno od odredaba prethodnog stava ovog člana, na vodovodnu mrežu može se priključiti i građevina koja nije izgrađena na osnovu odobrenja za građenje, ali za koju vlasnik građevine posjeduje odgovarajuće uvjerenje općinskog organa uprave za poslove građenja, da za takvu građevinu odobrenje za građenje nije potrebno.

##### **Član 22.**

**(Građevine koje se ne mogu priključiti na  
objekte i uređaje sistema snabdijevanja  
pitkom vodom)**

Građevine kod kojih odvodnja otpadnih i oborinskih voda nije rješena u skladu sa propisima koji regulišu oblast odvodnje i prečišćavanja otpadnih voda, odnosno propisima koji pregulišu izgradnju građevina, ne mogu se priključiti na javni sistem snabdijevanja pitkom vodom.

**Član 23.**

**(Posebna odluka o priključivanju građevina  
na objektu i uređaju sistema snabdijevanja pitkom vodom)**

Uslovi, način i postupak priključivanja korisnika usluga na vodovodnu mrežu (objekte i uređaje) javnog sistema snabdijevanja pitkom vodom utvrdiće se posebnom odlukom općine \_\_\_\_\_, u skladu sa odredbama člana 64. Zakona o komunalnim djelatnostima.

**VI USLOVI I NAČIN SNABDIJEVANJA PITKOM VODOM KORISNIKA USLUGE**

**Član 24.**

**(Obaveza korištenja usluge snabdijevanja pitkom vodom)**

Korištenje komunalne usluge snabdijevanja pitkom vodom obavezna je za sva fizička i pravna lica vlasnike građevina na području općine \_\_\_\_\_, u skladu sa članom 24. Zakona o komunalnim djelatnostima.

**Član 25.**

**(Obaveza posebnog priključenja na javni sistem snabdijevanja pitkom vodom)**

Svaka građevina koja se snabdijeva pitkom vodom iz javnog sistema snabdijevanja pitkom vodom mora imati poseban priključak na vodovodnu mrežu, uključujući i mjerni uređaj.

**Član 26.**

**(Obaveza ispravnosti vodovodnih instalacija i uređaja građevine koja se priključuje  
na javni sistem snabdijevanja pitkom vodom)**

Vodovodne instalacije i uređaji građevine koja se priključuje na javni sistem snabdijeva pitkom vodom moraju biti izgrađeni u skladu sa važećim tehničkim propisima, standardima i normativima.

**Član 27.**

**(Naknada za isporučenu pitku vodu)**

(1) Za isporučenu pitku vodu iz javnog sistema snabdijevanja pitkom vodom korisnik usluge plaća naknadu.

(2) Potrošnja vode mjeri se isključivo mjernim uređajima.

### **Član 28.**

#### **(Pravilnik o uvjetima i načinu snabdijevanja pitkom vodom)**

- (1) Davalac usluge će donijeti pravilnik o uvjetima i načinu snabdijevanja pitkom vodom korisnika usluge putem vodovodne mreže iz javnog sistema snabdijevanja pitkom vodom.
- (2) Saglasnost na pravilnik iz prethodnog stava ovog člana daje Općinski načelnik (ili općinsko vijeće) općine \_\_\_\_\_.

## **VII MEĐUSOBNI ODNOSI DAVAOCA I KORISNIKA USLUGE SNABDIJEVANJA PITKOM VODOM**

### **Član 29.**

#### **(Ugovor o pružanju odnosno korištenju usluge snabdijevanja pitkom vodom)**

Davalac i korisnik usluge snabdijevanja pitkom vodom dužni su zaključiti ugovor o pružanju odnosno korištenju komunalne usluge snabdijevanja pitkom vodom, kojim se regulišu prava, obaveze i odgovornosti davaoca i korisnika usluge, u skladu sa odredbama člana 25. Zakona o komunalnim djelatnostima.

### **Član 30.**

#### **(Sadržaj ugovora)**

Ugovorom iz člana 28. ove Odluke reguliše se naročito:

- a. Identifikacioni podaci o davaocu i korisniku usluge,
- b. predmet ugovora,
- c. način pružanja usluge od strane davaoca usluge,
- d. način obračuna, fakturisanja i plaćanja naknade za pruženu uslugu,
- e. obaveze davaoca usluge,
- f. obaveze korisnika usluge,
- g. razlozi za uskraćivanje usluge,
- h. razlozi za otkazivanje usluge,
- i. primjena zakonskih i podzakonskih propisa u pružanju i korištenju usluge,
- j. nadzor u provođenju odredaba ugovora,
- k. način rješavanja sporova.

### **Član 31.**

#### **(Obaveze davaoca usluge)**

Obaveze davaoca usluge u pružanju usluge snabdijevanja pitkom vodom korisnika usluge su naročito:

- a. obezbjeđenje korisniku usluge dovoljne količine pitke vode, propisanog kvaliteta i bez prekida,
- b. održavanje mjernih uređaja korisnika usluge u ispravnom stanju, u ključujućim i servisiranje i baždarenje,
- c. u najkraćem roku obavijestiti korisnika usluge o prekidu pružanja usluge, osim u slučajevima kada se prekid pružanja usluge nije mogao predvidjeti ni otkloniti,
- d. osiguranje korisniku najnužnijih količina pitke vode, u slučaju prekida u snabdijevanju pitkom vodom dužem od 12 sati,
- e. očitovanje mjernih uređaja u prisustvu predstavnika korisnika usluge,

- f. zamjena neispravnog mjernog uređaja u roku od 3 dana od utvrđivanja njegove neispravnosti, o trošku davaoca usluge,
- g. hitno postupanje po reklamaciji korisnika usluge,
- h. obavještanje korisnika usluge o preduzetim mjerama po reklamaciji korisnika usluge u roku od 24 sata po izvršenoj provjeri, odnosno uklanjanju razloga reklamacije,
- i. upoznavanje korisnika usluge o načinu obračuna, fakturisanja i plaćanja naknade za pruženu uslugu snabdijevanja pitkom vodom.

**Član 32.**  
**(Obaveze korisnika usluge)**

Obaveze korisnika usluge snabdijevanja pitkom vodom su naročito:

- a. održavanje kućnih vodovodnih instalacija u ispravnom stanju,
- b. omogućavanje pristupa mjernom uređaju predstavniku davaoca usluge u svakom trenutku,
- c. omogućavanje predstavniku davaoca usluge pregled kućnih vodovodnih instalacija u slučaju prekomjerne potrošnje pitke vode,
- d. blagovremeno obavijestiti davaoca usluge o eventualnoj promjeni u identifikacionim podacima,
- e. blagovremeno obavijestiti davaoca usluge o prekidu korištenja usluge zbog preseljenja, odnosno prestanku korištenja stambenog ili poslovnog prostora,
- f. plaćati naknadu za pruženu uslugu u roku od 15 dana od dana prijema računa,
- g. eventualno reklamirati iznos računa za pruženu uslugu u roku od 8 dana od dana prijema računa.

**Član 33.**  
**(Ostali elementi ugovora)**

Ostali elementi ugovora iz člana 28. ove Odluke bliže se regulišu u skladu sa odredbama Zakona o obligacionim odnosima, Zakona o komunalnim djelatnostima i odredbama ove Odluke.

**Član 34.**  
**(Akti koji se dostavljaju korisniku usluge)**

Davalac usluge je dužan korisniku usluge uz ugovor dostaviti ovu Odluku i Pravilnik iz člana 27. ove Odluke.

**Član 35.**  
**(Trajnost ugovora)**

- (1) Ugovor o pružanju odnosno korištenju usluge snabdijevanja pitkom vodom zaključuje se na neodređeno vrijeme.
- (2) Korisnik usluge može otkazati ugovor o pružanju odnosno korištenju usluge samo u slučaju prestanka korištenja stana ili poslovnog prostora, uz otkazni rok od 30 dana.
- (3) Korisnik usluge ne može otkazati ugovor o pružanju odnosno korištenju usluge snabdijevanja pitkom vodom, ako njeno obavljanje nije osigurao na drugi način, u skladu sa odredbama Zakona o komunalnim djelatnostima i odredbama ove Odluke.



## VIII USKRAĆIVANJE USLUGE SNABDIJEVANJA PITKOM VODOM

### Član 36.

#### (Uskraćivanje usluge snabdijevanja pitkom vodom korisniku usluge)

- (1)Davalac usluge snabdijevanja pitkom vodom može korisniku usluge uskratiti, odnosno obustaviti pružanje usluge u slijedećim slučajevima:
- ako korisnik usluge izvrši priključenje na javni sistem snabdijevanja pitkom vodom bez prethodno pribavljenog odobrenja nadležnog općinskog organa uprave, odnosno davaoca usluge,
  - ako korisnik usluge nenamjenski koristi uslugu u vrijeme ograničenog snabdijevanja pitkom vodom,
  - ako korisnik usluge uslugu koristi protivno propisima, odnosno odredbama ugovora o pružanju odnosno korištenju usluge snabdijevanja pitkom vodom,
  - ako korisnik usluge ne plati naknadu za isporučenu pitku vodu tri mjeseca uzastopno ili odbije da primi račun ili vrati račun za izvršenu uslugu davaocu usluge bez obrazloženog i opravdanog razloga,
  - ako korisnik usluge, bez saglasnosti davaoca usluge vrši prepravke na priključku, odnosno mjernom uređaju,
  - ako korisnik usluge onemogućiti pregled kućnih unutarnjih vodovodnih instalacija i uređaja, priključka i mjernog uređaja predstavniku davaoca usluge,
  - ako se korisnik usluge, koji je bio isključen sa javnog sistema snabdijevanja pitkom vodom, sam ponovo priključi, bez znanja odnosno saglasnosti davaoca usluge,
  - ako davalac usluge odvodnje i prečišćavanja otpadnih voda uskrati korisniku usluge pružanje usluge odvodnje i prečišćavanja otpadnih voda,
- (2)Davalac usluge može uskratiti, odnosno obustaviti pružanje usluge snabdijevanja pitkom vodom u slučajevima iz stava (1) ovog člana samo pod uslovom da to dozvoljavaju tehničke mogućnosti i da se time ne ugrožavaju drugi korisnici usluge snabdijevanja pitkom vodom.
- (3)Po prestanku razloga za uskraćivanje, odnosno obustavu pružanja usluge snabdijevanja pitkom vodom, davalac usluge je dužan da, na zahtjev korisnika usluge, u roku od 3 dana od dana podnošenja zahtjeva, omogući korisniku usluge ponovno korištenje usluge snabdijevanja pitkom vodom.
- (4)Troškovi ponovnog priključenja građevine korisnika usluge na javni sistem snabdijevanja pitkom vodom snosi korisnik usluge.

## IX NAČIN UTVRĐIVANJA, OBRAČUNA I PLAĆANJA NAKNADE ZA PRUŽANJE USLUGE SNABDIJEVANJA PITKOM VODOM

### Član 37.

#### (Općinska odluka o načinu formiranja cijena komunalnih proizvoda i usluga individualne komunalne potrošnje)

- (1)Jedinica mjere i način formiranja naknade za isporučenu pitku vodu iz javnog sistema snabdijevanja pitkom vodom utvrđuje se odredbama općinske odluke o načinu formiranja cijena komunalnih proizvoda i usluga individualne komunalne

potrošnje, donesenoj u skladu sa odredbama člana 34. i 35. Zakona o komunalnim djelatnostima.

(2) U skladu sa odredbama općinske odluke iz prethodnog stava ovog člana visinu naknade za isporučenu pitku vodu utvrđuje davalac usluge.

(3) Visina naknade za isporučenu pitku vodu koju utvrdi davalac usluge ne može se primjenjivati bez prethodne saglasnosti Općinskog vijeća.

#### **Član 38.**

##### **(Jedinica mjere isporučene pitke vode)**

Količina isporučene pitke vode mjeri se u kubnim metrima i očitava se na mjernom uređaju korisnika usluge.

#### **Član 39.**

##### **(Obračun utroška isporučene pitke vode)**

(1) Količina, odnosno utrošak isporučene pitke vode u objektima kolektivnog stanovanja sa više stambenih jedinica i drugim objektima sa više funkcionalnih cjelina ili jedinica utvrđuje se na osnovu očitavanja zajedničkog mjernog uređaja koji se nalazi na priključku objekta na javni sistem snabdijevanja pitkom vodom.

(2) Utrošak vode po stambenim, odnosno funkcionalnim cjelinama u objektima iz prethodnog stava ovog člana utvrđuje se tako da se utrošak vode evidentiran (očitan) na zajedničkom mjernom uređaju rasporedi na stambene, odnosno druge jedinice proporcionalno broju korisnika funkcionalnih cjelina.

(3) Izuzetno od odredaba prethodnog stava ovog člana u objektima kolektivnog stanovanja i objektima sa više funkcionalnih cjelina, kod kojih postoje i pojedinačni mjerni uređaji za svaku stambenu, odnosno drugu jedinicu, utrošak vode po stambenim i drugim jedinicama vršiće se tako da će se očitavati i zajednički i pojedinačni mjerni uređaji istovremeno, a nastala razlika iskazana između zajedničkog mjernog uređaja, kao osnovnog za obračun, i zbira utroška vode po pojedinačnim mjernim uređajima, rasporediće se po stambenim, odnosno drugim jedinicama proporcionalno utrošku vode očitanom na pojedinačnim mjernim uređajima tih jedinica.

#### **Član 40.**

##### **(Naknada za održavanje mjernog uređaja)**

Pored naknade za isporučenu, odnosno utrošenu pitku vodu korisnici usluge plaćaju i naknadu za održavanje mjernog uređaja.

#### **Član 41.**

##### **(Očitavanje, fakturisanje i plaćanje utroška isporučene pitke vode)**

(1) Utrošak vode davalac usluge očitava na kraju svakog mjeseca za protekli mjesec.

(2) Račun za pruženu uslugu, odnosno isporučenu pitku vodu davalac usluge ispostavlja korisniku usluge jedanput mjesečno .

(3) Rok za plaćanje računa je 15 dana od dana prijema istog i mora biti naznačen na svakom ispostavljenom računu.

(4) Račun za pruženu uslugu sadrži obavezno podatke o davaocu usluge, podatke o korisniku usluge, broj članova domaćinstva stambene jedinice, broj korisnika druge jedinice, količinu utrošene pitke vode, način obračuna naknade i visinu naknade po obračunskoj jedinici.

- (5) Na iznos ispostavljenog računa i obračun naknade za pruženu uslugu korisnik usluge ima pravo prigovora u roku od 8 (osam) dana od dana dostave računa, u protivnom se smatra da je obračun i iznos naknade ispravan.
- (6) Davalac usluge je dužan na prigovor korisnika usluge odgovoriti u roku od 8 (osam) dana od dana dostave prigovora.
- (7) Ako je davalac usluge uvažio prigovor, dužan je korisniku usluge ispostaviti novi ispravljen račun i izvršiti usklađivanje obračuna u svojim poslovnim knjigama.

#### **Član 42.**

##### **(Izmjena naknade za pruženu uslugu)**

U slučaju izmjene naknade za pruženu uslugu snabdijevanja pitkom vodom, davalac usluge je dužan blagovremeno obavijestiti korisnike usluge putem pojedinačnih obavijesti priloženih uz račune sa novim iznosima naknade.

## **X NAČIN POSTUPANJA I OVLAŠTENJA OPĆINE U OBAVLJANJU DJELATNOSTI SNABDIJEVANJA PITKOM VODOM**

#### **Član 43.**

##### **(Obaveza općine u obezbjeđivanju uslova za obavljanje djelatnosti snabdijevanja pitkom vodom)**

Općina \_\_\_\_\_ obezbjeđuje uslove za obavljanje djelatnosti snabdijevanja pitkom vodom na području općine \_\_\_\_\_, po načelima održivog razvoja.

#### **Član 44.**

##### **(Obaveza nadležnog općinskog organa uprave)**

- (1) Općina \_\_\_\_\_, putem svog organa uprave nadležnog za komunalne poslove, kontinuirano prati stanje u djelatnosti snabdijevanja pitkom vodom na području općine \_\_\_\_\_.
- (2) U praćenju stanja u obavljanju djelatnosti snabdijevanja pitkom vodom, općinski organ uprave nadležan za komunalne poslove prvenstveno prati davaoca usluge snabdijevanja pitkom vodom u izvršavanju zakona i drugih propisa u obavljanju djelatnosti i načinu i kvalitetu pružanja usluge korisnicima usluge na području općine \_\_\_\_\_.
- (3) Kada općinski organ uprave nadležan za komunalne poslove utvrdi, odnosno ocijeni da se u djelatnosti snabdijevanja pitkom vodom ne izvršavaju zakonski i drugi propisi od strane davaoca usluge, dužan je odmah preduzeti konkretne mjere za koje je ovlašten, odnosno općinskom načelniku i općinskom vijeću predložiti preduzimanje odgovarajućih hitnih mjera iz njihove nadležnosti za rješavanje prisutnih problema u obavljanju djelatnosti snabdijevanja pitkom vodom, u skladu sa zakonom.

#### **Član 45.**

##### **(Postupanje nadležnog organa uprave u slučaju poremećaja u snabdijevanju pitkom vodom)**

U slučaju nastupanja neočekivanih poremećaja ili prekida u obavljanju djelatnosti snabdijevanja pitkom vodom, odnosno u pružanju usluge korisnicima usluge, općinski organ uprave nadležan za komunalne poslove dužan je, čim primi obavijest, odnosno utvrdi da je došlo do poremećaja, odnosno prekida u obavljanju djelatnosti, da, bez odlaganja, preduzme slijedeće mjere i aktivnosti:

- a) utvrdi da li je davalac usluge preduzeo sve potrebne i adekvatne mjere, koje bi omogućile nastavak obavljanja djelatnosti snabdijevanja pitkom vodom i redovno pružanje usluge korisnicima usluge,
- b) odredi red prvenstva i način pružanja usluge snabdijevanja pitkom vodom onim korisnicima usluge kod kojih bi, uslijed prekida u isporuci pitke vode nastala opasnost po život i rad građana ili rad pravnih i fizičkih lica, ili bi nastala znatna, odnosno nenadoknadiva šteta.
- c) preko davaoca usluge, a po potrebi i drugih lica, preduzme mjere za otklanjanje nastalih posljedica, kao i druge mjere za nesmetano obavljanje djelatnosti snabdijevanja pitkom vodom i kontinuiranu isporuku pitke vode korisnicima usluge,
- d) naredi davaocu usluge da preduzme hitne mjere za zaštitu objekata i uređaja javnog sistema snabdijevanja pitkom vodom, kao i druge imovine koja je ugrožena,
- e) utvrdi razloge i eventualnu odgovornost za poremećaj, odnosno prekid u obavljanju djelatnosti snabdijevanja pitkom vodom i učinjenu štetu, te preduzme odgovarajuće mjere protiv odgovornih lica, uključujući i naknadu štete.

#### **Član 46.**

##### **(Usklađivanje općinske odluke o osnivanju javnog komunalnog preduzeća – davaoca usluge snabdijevanja pitkom vodom)**

U roku od 6 (šest) mjeseci od dana stupanja na snagu ove Odluke, Općina će izvršiti usklađivanje općinske odluke o osnivanju javnog preduzeća iz člana 4. ove Odluke (davaoca usluge) sa odredbama Zakona o komunalnim djelatnostima, koje regulišu postupak osnivanja, organizovanja, povjeravanje obavljanja djelatnosti i način obavljanja djelatnosti od strane javnog preduzeća čiji je osnivač općina.

## **XI NADZOR**

#### **Član 47.**

##### **(Upravni nadzor)**

Upravni nadzor nad provođenjem odredaba ove Odluke vrši općinski organ uprave nadležan za komunalne poslove.

#### **Član 48.**

##### **(Inspekcijski nadzor)**

- (1) Inspekcijski nadzor nad provođenjem odredaba ove Odluke vrši općinski komunalni inspektor.
- (2) Općinskom komunalnom inspektoru u vršenju inspekcijskog nadzora nad provođenjem odredaba ove Odluke pomaže komunalni redar.

## **XII KAZNE ODREDBE**

#### **Član 49.**

##### **(Prekršaji)**

(1) Novčanom kaznom od \_\_\_\_\_KM do \_\_\_\_\_KM kazniće se za prekršaj davalac usluge:

- a) ako se ne pridržava obaveza utvrđenih u članu 6. ove Odluke,
- b) ako se ne pridržava obaveza utvrđenih u članu 7. ove Odluke,
- c) ako u slučaju planiranog prekida u snabdijevanju pitkom vodom, ne postupi u skladu sa obavezom utvrđenom u članu 8. ove Odluke,
- d) ako u slučaju prekida u snabdijevanju pitkom vodom uzrokovanim djelovanjem više sile, ne postupi u skladu sa obavezom utvrđenom u članu 9. ove Odluke,
- e) ako se u slučaju prekida u snabdijevanju pitkom vodom ne pridržava obaveze iz člana 10. ove Odluke,
- f) ako u slučaju poremećaja u snabdijevanju pitkom vodom, ne postupi u skladu sa obavezama utvrđenim u članu 11. stav (2) ove Odluke,
- g) ako se u upravljanju i korištenju objekata i uređaja javnog sistema snabdijevanja pitkom vodom ne pridržava propisa iz člana 17. ove Odluke,
- h) ako javni sistem snabdijevanja pitkom vodom ne održava u ispravnom i funkcionalnom stanju, shodno odredbama člana 18. ove Odluke,
- i) ako na objektima i uređajima javnog sistema snabdijevanja pitkom vodom ne obezbijedi odgovarajuće mjere zaštite u skladu sa odredbama člana 19. ove Odluke,
- j) ako postupi suprotno odredbama člana 20. ove Odluke,
- k) ako na javni sistem snabdijevanja pitkom vodom priključi građevinu, kod koje nije na propisan način riješena odvodnja otpadnih i oborinskih voda (član 21.),
- l) ako na javni sistem snabdijevanja pitkom vodom priključi građevinu kod koje vodovodne instalacije i uređaji nisu izgrađeni u skladu sa važećim tehničkim propisima, standardima i normama (član 25.),
- m) ako se, u pružanju usluge snabdijevanja pitkom vodom korisnika usluge, ne pridržava obaveza utvrđenih u članu 30. ove Odluke,
- n) ako korisniku usluge uz ugovor ne dostavi ovu Odluku i Pravilnik iz člana 27. ove Odluke (član 33.)
- o) ako, u slučaju uskraćivanja usluge snabdijevanja pitkom vodom korisniku usluge, ne postupi u skladu sa odredbama člana 35. ove Odluke,
- p) ako, kod ispostavljanja računa za pruženu uslugu, odnosno isporučenu pitku vodu korisniku usluge, ne postupi u skladu sa odredbama člana 40. ove Odluke,
- r) ako, u slučaju izmjene visine naknade za pruženu uslugu snabdijevanja pitkom vodom, blagovremeno ne obavijesti korisnika usluge o toj izmjeni (član 41.).

(2) Za prekršaj iz stava (1) ovog člana kazniće se i odgovorno lice davaoca usluge novčanom kaznom od \_\_\_\_\_KM do \_\_\_\_\_KM.

#### **Član 50. (Prekršaji)**

(1) Novčanom kaznom od \_\_\_\_\_KM do \_\_\_\_\_KM kazniće se za prekršaj pravno lice kao korisnik usluge:

- a) ako se u slučaju poremećaja u snabdijevanju pitkom vodom ne pridržava uputstva o racionalnom korištenju pitke vode (član 11. stav 3.),
- b) ako se u korištenju usluge snabdijevanja pitkom vodom ne pridržava obaveza utvrđenih u članu 31. ove Odluke.

(2) Za prekršaj iz stava (1) ovog člana kazniće se i odgovorno lice pravnog lica korisnika usluge novčanom kaznom od \_\_\_\_\_KM do \_\_\_\_\_KM.

(3) Za prekršaj iz stava (1) ovog člana kazniće se i fizičko lice kao korisnik usluge novčanom kaznom od \_\_\_\_\_ KM do \_\_\_\_\_ KM.

**Član 51.  
(Prekršaji)**

(1) Novčanom kaznom od \_\_\_\_\_ KM do \_\_\_\_\_ KM kazniće se za prekršaj davalac usluge i pravno lice kao korisnik usluge ako izvrše priključenje građevine na javni sistem snabdijevanja pitkom vodom suprotno odredbama člana 24. ove Odluke.

(2) Za prekršaj iz stava (1) ovog člana kazniće se i odgovorno lice davaoca usluge i pravnog lica korisnika usluge novčanom kaznom od \_\_\_\_\_ KM do \_\_\_\_\_ KM.

(3) Za prekršaj iz stava (1) ovog člana kazniće se i fizičko lice kao korisnik usluge novčanom kaznom od \_\_\_\_\_ KM do \_\_\_\_\_ KM.

**Član 52.  
(Prekršaji)**

(1) Novčanom kaznom od \_\_\_\_\_ KM do \_\_\_\_\_ KM kazniće se za prekršaj pravno lice investitor objekta ili uređaja javnog sistema snabdijevanja pitkom vodom ako, u roku od 6 (šest) mjeseci od dana završetka izgradnje objekta ili uređaja, davaocu usluge ne preda na upravljanje, korištenje i održavanje izgrađene objekte ili uređaje (član 16.).

(2) Za prekršaj iz stava (1) ovog člana kazniće se i odgovorno lice u pravnom licu investitoru novčanom kaznom od \_\_\_\_\_ KM do \_\_\_\_\_ KM.

**Član 53.  
(Prekršaji)**

(1) Novčanom kaznom od \_\_\_\_\_ KM do \_\_\_\_\_ KM kazniće se za prekršaj općinski organ uprave nadležan za komunalne poslove ako se ne pridržava obaveza iz člana 43. ove Odluke.

(2) Za prekršaj iz stava (1) ovog člana kazniće se i odgovorno lice općinskog organa uprave nadležnog za komunalne poslove novčanom kaznom od \_\_\_\_\_ KM do \_\_\_\_\_ KM.

**XIII PRELAZNE I ZAVRŠNE ODREDBE**

**Član 54.  
(Rok donošenja pravilnika)**

Pravilnik iz člana 12. ove Odluke davalac usluga će donijeti u roku od 3 (tri) mjeseca od dana stupanja na snagu ove Odluke.

**Član 55.  
(Rok donošenja pravilnika)**

Pravilnik iz člana 27. ove Odluke davalac usluge će donijeti u roku od 3 (tri) mjeseca od dana stupanja na snagu ove Odluke.

**Član 56.  
(Prestanak važnosti Općinske odluke)**

Danom stupanja na snagu ove Odluke prestaje da važi Odluka o snabdijevanju pitkom vodom („Sl. glasnik općine \_\_\_\_\_“ broj \_\_\_/\_\_\_).

#### **Član 57.**

##### **(Prestanak važnosti pojedinih odredbi Odluke o komunalnom redu)**

Danom stupanja na snagu ove Odluke prestaju da važe odredbe člana \_\_\_\_\_ do člana \_\_\_\_\_ Odluke o komunalnom redu („Sl. glasnik općine \_\_\_\_\_“ broj \_\_\_/\_\_\_), koje se odnose na obavljanje djelatnosti snabdijevanja pitkom vodom na području općine \_\_\_\_\_.

#### **Član 58.**

##### **(Stupanje na snagu Odluke)**

Ova Odluka stupa na snagu osmog dana od dana objavljivanja u Službenom glasniku općine \_\_\_\_\_.

Broj: \_\_\_\_\_

Datum: \_\_\_\_\_

Predsjedavajući OV-a

\_\_\_\_\_

Napomena:

- Odredba člana 55. ostaje samo u slučaju da već postoji Odluka o snabdijevanju pitkom vodom, koju treba staviti van snage donošenjem ove Odluke.
- Odredba člana 56. ostaje samo u slučaju da je u važećoj općinskoj Odluci o komunalnom redu regulisano i obavljanje djelatnosti snabdijevanja pitkom vodom).
- Kada se u zagradi daje alternativa, izbor opcije ostaje na općini.